

Wednesday, April 8, 2026

Time - 2:30pm - 2:35pm

AKASHVANI AIZAWL

REGIONAL NEWS UNIT


AMC

Aizawl Municipal Corporation (AMC) Mayor hlui, Pu Lalrinenga Sailo chuan AMC leh LMC ten khawpuia cheng mipuite tana hmasawna hna an thawhna tur sum, cheng vbc 33, nuai 96, sing 5, 2,000 ti lapse tu ZPM sorkar chu Municipality enkawltir tlak an ni lova mipuiten an hnawl a tul a ti.

He thu hi vawiina Aizawl Press Club a thuthar thehdarhtute an kawmnaah sawiin, MNF General Hqrs. Adviser ni bawk Pu Lalrinenga Sailo chuan Khawpuia cheng mipuite tana AMC leh Lunglei Municipal Corporation (LMC) ten hna an thawhna tur sum Finance Commission ruahman fel vek tawh cheng Nuai 3,400 chuang zet chu ZPM sorkarin a ngaihthah vang liau liauin, central sorkar kutah a let leh vek a, hetiang taka Municipality ngaihthahtu leh hrek bettu ZPM hi AMC enkawltir tlak an ni lo a ti a. ZPM sorkar chuan anmahni sorkarna ngei, LMC-in Lunglei khawpuia cheng mipuite hmasawna hna a thawhna tur, Finance Commission 15-na in a ruahmansak, kum 2024-25 chhung atan cheng vbc 9 nuai 23 sing 1 & 2,000/- leh 2025-26 chhunga an hmuh tur cheng vbc 9 nuai 46 sing 8- a belhkhawmin cheng vbc 18 nuai 69 sing 9 & 2,000/- zet chu hman theih lova siamin, heng sumte hi central sorkarah a let (lapsed) vek a. LMC chuan MNF sorkar hunlai, 2023-24 chhunga an hmuh cheng vbc 6 nuai 35 sing 4 & 4,000/- bak Finance Commission sum pek hi an la dawng ve reng reng lo a, ZPM sorkar hnuaiah kum 2 chhung a zawnin an chan tawh a ti a.

Pu Rinenga chuan AMC in Finance Commission 15-na atanga a sum hmuh tur, AMC-a MNF sorkarin lehkha pawimawh zawng zawng engkim an chinfel vek pawh, ZPM sorkar chuan a tih ve tur, 'Grant Transfer Certificate' chu Ministry of Finance leh Ministry of Urban Affairs-ah te a huna a thawn loh avangin cheng vbc 15 nuai 26 sing 6 lai chu central sorkarah a let bawk a, LMC leh AMC ten khawpuia cheng mipuite tana hmasawna hna an thawhna tur sum ZPM sorkarin a tih lapse belhkhawm chu cheng vbc 33 nuai 96 sing 5 & 2,000/- lai a tling tih sawiin, hetiang taka anmahni sorkar siamna ngei LMC pawh ngaihthahtu leh AMC sum hmuh tur pawh Certificate pakhat lek thawn duh loh vang a ti lapse duhtu ZPM party chu khawpui enkawltir tlak an ni lova mipuiten an hnawl a tul tih a sawi a ni.

Hetiang hi thil awmdan dik tak anih laia Chief Minister in AMC tan sum tam tak an nawr chhuak tih te, AMC-ten an ngawih bopui veng veng a, March ni 18 khan an hrechhuak chauh a, MNF AMC-te khan Aizawl an lo vei lo hle a ni tih mipui hmaa a sawi duh maite chu thu dik hre reng chung a mipui bum tumna, koham taka AMC thuneihna an inpek thup tumna thil tha lo leh zahpuiawm tak a ni a ti bawk.



LAWNGTLAI

Lawngtlai Bawrhsap Pu Donny Lalruatsanga kaihruaiin a Office Chamber-ah Ruihhlo do beihpui thlakna 'Operation Jericho' kalpui mek thlrho a ni a. Pu PC Lalchunglura Superintendent of Police chuan a telpui.

Pu Donny Lalruatsanga chuan 'Operation Jericho' chu Lawngtlai District bikah nikum October atanga kalpui tan a nih thu sawiin, a hlawhtlinna kawng hrang hranga hmuh niin, Ruihhlo lutchhuak a tlem hle a ni, a ti. Bawrhsap chuan he Operation - ah hian Police, Excise & Narcotic, Central YLA, YLA Sangau Sub Headquarters, YLA Bualpui Ng Sub Headquarters, Executive Magistrate, MHIP, LWA, MJA, Eastern Zone VC, 3rd IR leh 34 Assam Rifle te lungruat takin an thawkho a ti a, Pu Donny Lalruatsanga chuan 'Operation Jericho' kalpui mek chu tihtawp theih a nih lo thu sawiin, district Administration chuan theih ang angin, chak taka kalpui chhonzawm a nih tur thu sawiin, VC,NGOs, Kohhran leh Lawngtlai District mipuite tha taka lo tawiawm zel turin a sawm.

SP Pu PC Lalchunglura chuan Operation Jericho - hnuaiiah 'check gate' siam a ngawrh taka duty a nih thu a sawi a. Awareness Campaign chak taka kalpui niin, drug license holder- te pawh endik an nih thu a sawi a. Operation Jericho- hnuaiiah duty - te mamawh lirthei, POL, Ei leh in tur bakah thil dangte a theih ang anga pek a nih thu sawiin, thawhhona tha tak hnuaiiah Ruihhlo do chu a hlawhtling tha hle ni a ahriat thu a sawi a. Ruihhlo do kawngah tha thlah theih a ni lo tiin, kalpui chhonzawm a tul thu a sawi.

Excise and Narcotics lam pawhin report pe in, Operation Jericho kalpui mekah case - 35 ziahluh tawh niin, mihring -33 man an ni tawh a. Zu bikah lit 102 litres man a ni tawh a, ND& PS hnuaiiah tun thlengin case ziahluh a awm lo a ni.

Central YLA hruiute chuan Central YLA hnuaiiah Drugs Reduction Squad (DRS) ten chak takin hma an lak chhonzawm tur thu an sawi a, Lawngtlai District chungna Ruihhlo a rêm theihna tura theihtawp an chhuah zel tur thu an sawi

Thutkhawm chuan 'Operation Jericho' vanga nasa taka Ruihhlo a tlem thu pawm tlangin, State sawrkarin kalpui chhonzawm lo pawh ni se Lawngtlai District bikah chuan thla thum chung atan kalpui chhonzawm ni se an ti a ni.



SOCIAL WELFARE

Nu leh pa leh upaten dan hnuaiiah dikna chanvo an neih leh hamthatna an hmuh theihteClub-ah Maintenance & Welfare of Parents & Senior Citizens Act chungchang zirhona Social Welfare, Women & Child Development Department leh Regional Resource & Training Centre for Senior Citizen tangkawp chuan vawin khan Aijal Club-ah an buatsaih a

He hunah hian, Elderline Programme Manager Pu Lalbiaksanga chuan Elderline chungchang sawiin kum upa tanpui ngai chuan phone number 14567 ah an call chuan an lo tanpui theih reng thu a sawi a. He dan hnuaiiah hian upa kum 60 chunglam enkawltu neilo te chu an fate emaw fa neilo chu an chhungte emaw an ro khawmtu in an enkawl tur ani a. He dan hmang hian fa ten an enkawl loh nu emaw pa te/chhungte/rokhawmtu chu action lak sak theih an ni a, a enkawl duhlo tu an fa te/chhungte/rokhawm tu chu thla khata cheng 10000/- thleng an nu leh pa te/pi leh

Pu/chhungte/ro an khawm sak te chu in enkawl na tur pek tir theih a ni. Hei bakah hian inlaichinna awmlo mahse, rokhawm saktu in a rokhawm saka kha a enkawl duh leh siloh chuan, kha ro kha lak let sak theih a ni. District tinah Tribunal hi din tur a ni a, hetah hian complaint hi thehluh theih a ni.

Training hi Maintenance & Welfare of Parents & Senior Citizen Act 2007 dan in a phut angin, dan kengkawh tur a din Appellate leh Maintenance Tribunals member, District hrang hrang atangin D.C, S.P, SDPO leh thawktu dang hemi kaihnhawih hrang hrangte koh khawm an ni a, MUP, MHIP, CYMA, MKHC leh NGO dangte sawm an nih bakah department officials leh staff te an tel bawk.

